

Despues di a keda nomina varios biaha

Aeropuerto di Aruba ta gana premio “Routes Americas Airport Marketing”

ORANJESTAD – Despues di varios intento y nominacion, porfin Aruba Airport Authority ta logra e premio mayo pa miho aeropuerto di region di America, cu ta procesa menos cu 4 milyon pasajero. E muestra tabata e comienso di e siman aki ora cu na Cartagena de las Indias, Colombia, e representante di AAA NV, hefe di mercadeo Jo-Ann Arends, a ricibi e Routes Americas Airport Marketing Award 2013. Segun vocero di aeropuerto Hendrik Croes, e ultimo añanan aki Aruba tabata figura constantemente den e finalistanan, sea como nominado of como ganador number 2 of tres. E biaha aki, Aruba a bay cu e premio maximo.

PORFIN A GANA

“Porfin nos por bisa cu aeropuerto di Aruba ta gana e Routes Americas Marketing Award 2013 pa menos di 4 milyon pasajero” Croes a bisa BON DIA ARUBA ayera.

E premio aki pa aeropuerto ta nifica cu e trabou duro cu ta wordo haci di parti di AAA Airline marketing ta wordo reconoci.

“E ta algo cu nos por uza den tur campaña pa sigui promove Aruba y tambe aeropuerto en general, pa asina atrae mas aerolinea pa bishita Aruba” Croes a bisa, teniendo cuenta cu e otro premionan cu Aruba a bin ta ricibi den e ultimo temporada. Croes ta considera esaki tambe como un plus punt den full e strategia

cu ta wordo uza pa atrae mas aerolinea pa bin Aruba.

Fuera di nos aeropuerto, otro aeroportonan cu a cay den premio ta Lynden Pindling International Airport, Nassau, cu a haya e premio di ‘Highly Commended’. Tambe tabatin riba e lista di ganado, Alejandro Velasco Astete International Airport, Cuzco, Hewanorra International Airport, St Lucia y Owen Roberts International Airport, Grand Cayman.

TRABOU CONHUNTO

Trabounan cu ta wordo haci conhuntamente cu Aruba Hotel and Tourism Association, hunto cu Aruba Tourism Authority, ta gran parti cu ta laga Aruba sali victorioso den

e categoria aki. “Den e caso aki ta trata di Routes America, pues e region di America. Pero tambe tin otro categoria cu ta wordo premia cu ta e.o. e World Routes Marketing Award” Croes a bisa. Aki tambe e aeropuerto di Aruba ta cay aden, y unda cu tambe nan a clasifica a base regular. Nan ta spera cu dentro di poco esaki tambe por duna un bon resultado pa loke ta e awardnan aki den e di tres kwartaal di e aña aki. E loke ta duna AAA mas satisfaccion ta cu ta e propio aerolineanan ta esnan cu ta vota a base di nan propio experiencia cu nan tin rond mundo, cu ta duna nan un voto pa e aprecio pa e trabou extenso di parti di nos aeropuerto.

ROUTES AMERICAS

Routes Americas ta e unico evento cu ta trece e protagonista hunto den e industria di aerolinja y aeropuerto di Noord, Central y Sur America y Caribe, sostiene pa autoridad turistico.

Esnan cu ta tuma decision den e mercado aki ta atende e evento aki pa desaroya rutanan nobo pa, di y entre Americas, y ta habri pa discuti oportunidadnan di mercado nobo, expande esnan existente y ta revista strategia pa mantene y mehora nan. E eventonan ta wordo teni na varios sitio strategico manera e ultimo cu a wordo teni entre 10 pa 12 di februari ultimo na Colombia. □